

दिनांक 30.09.2025

समय: 18.45 बजे

आकाशवाणी जयपुर-अजमेर

समाचार

- मुख्यमंत्री भजन लाल शर्मा कह्यो— सेवा पखवाड़ा रा तैत प्रदेश मांय 4 हजार ऊँ बत्ता ग्रामीण सेवा शिविर लगा र जनता ने साता दीरीजी।
- केन्द्रीय संस्कृति अर पर्यटन मंत्री गजेन्द्र सिंह शेखावत नुवी तकनीक अर आर्टिफिशियल इंटेलीजेंस रा ज़माना मांय सांस्कृतिक विविधता ने बचावण माथे जोर दीनो।
- महाअष्टमी रे मौके आज आखा राज्य मांय देवी मन्दिरां मांय भांत-भांत रा कार्यक्रम राख्यी ज्या।

अर

- प्रदेश मांय मौसम बदलण ऊँ केई ठौड़ जोरदार मेह बरस्यो।

000

मुख्यमंत्री भजनलाल शर्मा आज ब्यावर ज़िला रा जैतारण मांय राख्यी ज्या सेवा पखवाड़ा कार्यक्रम मांय शामिल व्ह्या। ई मौके वे कह्यो के देश तेजी ऊँ खुद रे पाण ऊबो व्हेवण री दिशा मांय बढ़ रह्यो है। वे कह्यो के सरकार ने नौजवानां रा भविष्य री चिन्ता है अर हाल ताई 91 हजार ऊँ बत्ता नियुक्ति पत्र जारी कर्या जा चुक्या है। श्री शर्मा कह्यो के सेवा पखवाड़ा रा तैत हाल ताई लगायी ज्या चार हजार एक सौ इक्कीस ग्रामीण सेवा शिविर रे मार्फत जनता ने साता मिली है। वे जैतारण ऊँ विकास रा 300 करोड़ रुपया रा खर्च वाळा कामां री नीव रखी अरे पूरा व्ह्या काम जनता ने सूप्या। मुख्यमंत्री बांसवाड़ा मांय न्यूक्लियर पावर प्लांट री नीव रखण ने बिजली संकट खत्म करण री दिशा मांय मोटो जतन बतायो। वे कह्यो के सरकार जनता ऊँ करी ज्या सगळा वायदा मन ऊँ पूरा करणो तैय कीनो है।

सेवा पखवाड़ा रा तैत आज हनुमानगढ़ मांय राख्यी ज्या जिला स्तर रा कार्यक्रम मांय पैली वाळा कैबिनेट मंत्री डॉ. रामप्रताप चौधरी ई शामिल व्ह्या।

000

देश मांय लारला ग्यारह साल मांय प्रधानमंत्री नरेंद्र मोदी री अगुवाई मांय भणार्ई-लिखाई रा यिस्टम ने मज़बूत बणावण सारु केई जतन करी ज्या है। सरकार लचीली शिक्षा, बहुविषयकता अर अंतर्राष्ट्रीयकरण ने बधावो देवण सारु निपुण भारत मिशन, पीएम श्री योजना, राष्ट्रीय पाठ्यचर्या रूपरेखा अर राष्ट्रीय ऋण रूपरेखा सरीखा जतन कीना। सरकार जुलाई 2020 मांय स्कूली शिक्षा अर तकनीकी शिक्षा समेत आला दर्जा री भणार्ई-लिखाई मांय सुधार लावण सारु राष्ट्रीय शिक्षा नीति पेश कीनी। सरकार री कोशिशें ऊँ विश्वविद्यालयां अर कॉलेजां समेत उच्च आला दर्जा रा शिक्षण संस्थानां री तादाद साल 2014-15 री 51 हजार रे मुकाबले बध र ई

साल 70 हजार ने पार कर गयी। साल 2014 मांय एम्स संस्थानां री तादाद 7 ऊं बध र 23 व्हे गयी है, जद के मेडिकल कॉलेजां री तादाद 387 ऊं बध र दो हजार ने पार कर गयी है, ज्यां मांय करीब दो लाख सीटां हैं।

000

रक्षा मंत्री राजनाथ सिंह कह्यो है के देश रा सशस्त्र बलां ने जरूरतां रे मुजब समाधान विकसित करण री जरूरत है। श्री सिंह आज नई दिल्ली मांय फौज रा तीन ई अंगां री संगोष्ठी मांय बोल रह्या हा। रक्षा मंत्री कह्यो के फौज रा तीन ई अंग एक आवाज़, एक लय अर एक ताल मांय काम करेला तो देश हर मोर्चा माथे विरोधियां ने जवाब दे सकेला। रक्षा मंत्री कह्यो के फौज रा तीन ई अंगां रा बेहतरीन तालमेल री ताजा मिसाल ऑपरेशन सिन्दूर है।

रक्षा मंत्री कह्यो के साइबर अर सूचना युद्ध रा मानकां रा एका री जरूरत है। संगोष्ठी मांय प्रमुख रक्षा अध्यक्ष जनरल अनिल चौहान, वायु सेना प्रमुख एयर चीफ मार्शल अमरप्रीत सिंह अर नौसेना प्रमुख एडमिरल दिनेश के. त्रिपाठी ई मौजूद हा।

000

केंद्रीय संस्कृति अर पर्यटन मंत्री गजेंद्र सिंह शेखावत कह्यो है के नुवी तकनीक अर आर्टिफिशियल इंटेलिजेंस रा दौर मांय म्हां ने सांस्कृतिक विविधता ने बचावणी व्हेला। वे यूनेस्को री ओर ऊँ अमरीका रा बार्सिलोना मांय राख्यी ज्या अंतरराष्ट्रीय सम्मेलन मांय भारत री नुमाइन्दगी कर रह्या हा। शेखावत कह्यो के ए.आई. ने कलाकारां अर समुदायां ने मजबूत बणावण रा औजार रा तौर ऊँ काम लियो जावणो चाहिजे। सम्मेलन रे दौरान श्री शेखावत स्पेन रा संस्कृति मंत्री ऊँ मुलाकात कीनी। ई दौरान दोन्यू देश साल 2028 ताई सांस्कृतिक आदान-प्रदान कार्यक्रम रा करार माथे सही कीनी। साल 2026 रे भारत-स्पेन संयुक्त सांस्कृतिक वर्ष व्हेवण रो ऐलाण करी ज्यो।

000

उपमुख्यमंत्री दीया कुमारी आज जोधपुर जिला मांय पालुखुर्द रा आंगनबाड़ी केन्द्र रो दौरा कीनी। वे केन्द्र रा बच्चां सागे बातचीत कीनी। दीया कुमारी केन्द्र माथे काम करण वाळी कार्यकर्तावां ऊँ बच्चां ने दिया जावण वाळा भोजन री गुणवत्ता रो जायजो लीनी। ई मौके उपमुख्यमंत्री कह्यो के सरकार बच्चां रो पूरा विकास करणो तैय कीनी है अर आंगनबाड़ी केन्द्रा ने और बेहतर बणावण री कोशिश करी जा रही है। वे अहलकारां ने आं केन्द्रां री व्यवस्थावां माथे खास ध्यान देवण रा हुकम दीना।

000

नौरता रा आठवां दिन आज महाअष्टमी रे मौके देवी दुर्गा रा महागौरी रूप री पूजा करी जा रही है। ई मौके राष्ट्रपति द्रौपदी मुर्मू, प्रधानमंत्री नरेन्द्र मोदी अर केंद्रीय गृह मंत्री अमित शाह जनता ने शुभकामनावां दीनी है। प्रदेश रा देवी मंदिरां मांय मोटी तादाद मांय जातरू पूग्या। नामी शक्तिपीठां अर मिन्दरां मांय धार्मिक अनुष्ठान, पूजा-अर्चना अर यज्ञ कुंडां मांय आहुतियां दीरीजी। डूंगरपुर रा आशापुरा अर विजवामाता शक्तिपीठ, बाड़मेर मांय वीरातरा रा वांकल माता अर करौली रा कैला देवी मिन्दर समेत न्यारा-न्यारा मिन्दरां मांय मोटी तादाद मांय जातरू पूग्या। पाली रा करणी माता मिन्दर मांय भक्त कन्यावां रा पग धोया अर चांदी री थाळी मांय जीमायी। कैलादेवी मांय चाल रह्या नौरता रा मेळा मांय आज

दुर्गाष्टमी रे मौके राजस्थान समेत न्यारा—न्यारा राज्यां रा जातरू माता रा दर्शन कर र मनौती मांगी।

मुख्यमंत्री भजन लाल शर्मा ब्यावर रा जैतारण मांय कन्या पूजन कीनो। जोधपुर मांय उपमुख्यमंत्री दिया कुमारी दुर्गाष्टमी रे मौके 101 कन्यावां रो पूजन कीनो। वे कन्यावां ने देवी रो रूप बताता थकां वां रा पग धोया, वां ने जीमायी अर भेंट दीनी। ई दौरान दिया कुमारी प्रधानमंत्री नरेंद्र मोदी रा **‘बेटी बचाओ बेटी पढ़ाओ’** अभियान री सराहवणा कीनी अर बेटा—बेटियां ने बराबर मौका देवण सारू कह्यो। सवाईमाधोपुर मांय ई घरां अर मिन्दरां मांय कन्या पूजन अर गरबा—डांडिया रा आयोजन राखी ज्या।

000

प्रदेश मांय सामाजिक न्याय अर अधिकारिता विभाग री ओर ऊँ अंतर्राष्ट्रीय वृद्धजन दिवस रा सिलसिला मांय काल समाज कल्याण सप्ताह सरू कर्यो जावेला। ई सप्ताह रो मकसद कमजोर तबका री जनता मांय अधिकारां रा बारा मांय जाग जगावणो है। जयपुर मांय जिला प्रशासन री ओर ऊँ बुजुर्गा ने जरूरत रा साज—ओ—सामान दिया जावेला। सक्षम जयपुर अभियान रा तैत जामडोली रा सामाजिक न्याय संकुल मांय शिविर लगाया जावेला। इण मांय राष्ट्रीय वयोश्री योजना रा तैत व्हीलचेयर अर सुणबा री मशीनां समेत न्यारा—न्यारा सामान दिया जावेला। सवाईमाधोपुर मांय ई बुजुर्गा सारू पेंशन मंजूरी, मान, चिकित्सा जांच अर वृद्धाश्रम मांय जरूरी सामान मुहैया कराया जावेला।

000

प्रदेश रा वन्यजीव अभयारण्यां मांय काल नुवो पर्यटन सत्र सरू व्हेला। पाली जिला रा जवाई बंधा हलका रा वन्यजीव अभयारण्य मांय काल जीप सफारी अर सैलानियां री आवाजाही ओजू सरू व्हे जावेला। सवाईमाधोपुर रा जग प्रसिद्ध रणथंभौर राष्ट्रीय उद्यान मांय ई नुवा पर्यटन सत्र सारू देशी—परदेशी सैलानियां री आवाजाही सरू व्हे गयी है। चौमासा पाछे जंगल रा सोहवणा नजारा देखण अर टाइगर सफारी रो रोमांच महसूस करण सारू सैलाणियां मांय खास उमाव निजर आ रह्यो है।

000

बाड़मेर मांय आठ अक्टूबर ने थार महोत्सव सरू व्हेला। पर्यटन विभाग अर जिला प्रशासन री ओर ऊँ राख्या जावण वाळा दो दिन रा ई महोत्सव री सरूआत शोभायात्रा सागे व्हेला। आदर्श स्टेडियम मांय थार श्री, थार सुंदरी, मूँछ प्रतियोगिता, ऊंट शृंगार, रस्साकशी अर पणिहारी मटका दौड़ सरीखी होड़ां राखी जावेला। इण ई दिन सांस्कृतिक संध्या ई राखी जावेला। महोत्सव रा दूजा दिन, ऐतिहासिक किराडू मिन्दर मांय लोक कलाकार सांस्कृतिक कार्यक्रम पेश करेला। ई दौरान लोग—लुगाई रा जोड़ां री दौड़ अर मेहंदी माण्डण री होड़ां राखी जावेला। थार महोत्सव महाबार रा रेतीला धोरां माथे राखी जावण वाळी सांस्कृतिक संध्या सागे पूरो व्हेला।

000

प्रदेश रा केई हलकां मांय आज मौसम बदल जावण ऊँ तेज मेह बरस्यो। बिरखा ऊँ गर्मी ऊँ साता मिली। जयपुर, सिरोही, धौलपुर, श्रीगंगानगर अर करौली मांय व्ही बिरखा ऊँ पारो थोड़ो उतर्यो। धौलपुर मांय सड़कां माथे पाणी भर ग्यो। पाली मांय किसानां ने साखां री चिन्ता व्हे गयी। मौसम विभाग रे मुजब, आज शेखावाटी हलका समेत जयपुर, भरतपुर,

अजमेर, जोधपुर अर बीकानेर संभाग मांय बादळां री गाज सागे बिरखा व्हेवण रा आसार है। महकमो शेखावाटी हलका मांय भारी बारिश सारू चेतायो है।

000